

3

no. 4

DISCOURS SUR L'INIUSTICE DES
plainctes qu'on fait contre le gouuernement de l'Estat.

1617

IL y a desia quelque temps, que ceux qui s'i-
maginent ne pouuoir trouuer aucun repos,
sinon dans les troubles; qui veulent se baigner
dans le sang des François, & qui recherchent
pour apuyer leur maudite ambition, les es-
motions, & la ruyne entiere de ce ceste florif-
sante Monarchie, ne cessent de rechercher ob-
stinément tous les moyens qu'ils peuuent esti-
mer les plus propres, pour paruenir à vn si exe-
crable dessein. Quand ils se voyent estre re-
poussez de quelque costé, ils courent de toutes
parts, comme des enragez, iusques à ce que
quelque autre occasion s'offre à eux, pour seruir
à leurs damnables intentions: comme s'ils re-
noient la paix publique assiegee avec resolutiō
de la faire perir, & tout l'Estat avec elle: Ils ne se
lassent point, d'employer toutes sortes de ma-
chines, de la forcer de tous costez, & se glorifier
d'auoir prins à tasche de la reuerfer, & d'estruir
entierement. Ils ont failly à leur coup, lors
des mescontentemens de quelques grands du
Royaume, auxquels la Reyne, par vne prudēce
& douceur incomparable, a iusques à présent
tres-bien pourueu. Ils ont esté frustrez es
mouuemens de ceux de la Religion Preten-
due Reformee, qui ont esté dissipez par l'au-
thorité du Roy. Ils n'ont peu dans le Parlemēt
de Paris, qui est le vray Temple de la Paix,
trouuer vn iuste suiet pour troubler le repos de
l'Estat. Ils n'ont sceu porter les Estats Gene-
raux, au mespris de leur Souuerain, & ont

veut tout au contraire , que ce corps représen-
 tant tout le Royaume, n'a trauaillé que pour
 affermir la paix, & l'obeyssance de tous les Frā-
 çois à leur Roy. Ils ont veu que ceste assemblée
 en corps estoit inuincible, que tous les artifices
 qu'on employoit pour la diuiser estoient sans
 effet , & que ces parties nobles de l'Estat ne
 vouloyent point receuoir aucune mauuaise
 impressiō de rebelliō ou desobeissance. Main-
 tenant comme s'ils vouloyent tirer ces fleches
 hors de la trouffe, pour les briser estant separees
 n'ayant sceules ployer seulement lors qu'elles
 estoient conioinctes : N'ozans point assaillir
 l'Eglise qui aura tousiours les oreilles bou-
 chees à leurs enchantemens, & la bouche ou-
 uerte pour descrier les maux qu'ils veulent fai-
 re à la Religion & à l'Estat : N'ozans point se
 promettre que le peuple, sur lequel tombe à la
 fin tout le malheur des guerres, veuille estre ce-
 luy qui prendra le feu à la main pour embrazer
 cet Empire. Ils ont estimé que le plus seur moyē
 pour ruyner l'autorité du Roy estoit , d'es-
 mouuoir la Noblesse qui est son bras droict , de
 l'animer à l'encontre du Gouuernement qu'el-
 le a tousiours fidellement soustenu : Et comme
 s'ils dressoient l'appareil d'une sanglante trage-
 die, ils ont fait depuis peu monter sur le theatre,
 non pas la vraye Noblesse Françoisse, mais quel-
 ques detestables seditieux , quelques esprits
 perdus, quelques bastards, & degenez Fran-
 çois, que faussement & meschammēt ils appel-
 ent, *La Noblesse Françoisse au Chancelier*: à laquelle
 ils font tenir , non pas les discours qui luy sont
 ordinaires, & desquels elle doit vser en parlant

de leurs Majestez, & du gouvernement de l'E-
 stat: mais bien les plus furieux, & les plus des-
 bordez, dont puissent iamais vser ceux qui au-
 ront dessein de viure sans Dieu, sans Roy, sans
 repos, & sans Noblesse. Mais commel'Hyene
 furieuse qui contrefait la voix des hommes sur
 les chemins, deuore à la fin ceux qui s'amuse-
 nt à l'escouter: Ainsi ces forcenez, qui prennent le
 glorieux nom de Noblesse, qu'ils desmentent
 par leurs œures execrables, ne peuvent par la
 fuite de leurs discours supposez, de leus mena-
 ces seditieuses, & de leurs escrits detestables, que
 causer la ruine & la destruction de ceux qui
 leur donnent audience, & qui se laissent gaster
 le cœur, du venin de leurs tragiques & sanglan-
 tes exclamations: Car l'esprit qui les possède est
 celuy-là mesme qui a introduit le premier au
 monde l'effusion du sang, les cruantez, les calō-
 nies, & la ruine des hômes, qui a aussi exprimé
 au vif son naturel en tous leus discours qui ne
 rêdēt qu'à perdre & destruire tous les François
 par le moyen des guerres ciuilles: & qui pour y
 paruenir plus facilement employent des impo-
 stures, & faussetez horribles, qui sont les exerci-
 ces ordinaires de l'enemy cōmun du genre hu-
 main, qui est appellé pour ceste raison le pere de
 mensonge. Et de fait cōme il est faux en toutes
 fortes que iamais les Deputez de la Noblesse en
 corps n'y aucū d'eux en particulier, ayēt tenu à
 Monsieur le Chancelier les discours que ce
 malheureux rapporte: Aussi est-il plus faux
 que la fausseté mesme, que tels discours, ayēt
 peu estre conceus dans le cœur, ie ne diray pas
 de Messieurs de la Noblesse, mais mesme d'au-
 cun bon François de quelque conditiō moins

releuee, n'ayans peu estre formez qu'en l'esprit de quelque beste furieuse, ou de quelque monstre, qui ne tient rien de l'homme que la parole & la main. Ce n'est pas la Noblesse Françoise qui ne se souille, & ne se deshonore iamais en publiant des libelles diffamatoires: Car c'est le crime ordinaire des ames basses, lâches, & noires, qui mettent leur felicité à mesdire en cachettes, de ceux qu'ils flattent ordinairement en public. Ce n'est pas la Noblesse Françoise, qui deteste toute sorte de mensonges, n'y ayant point de vice pour le reproche duquel, elle se porte plustost à exposer sa vie, que celuy de l'imposture. Ce ne peut estre la Noblesse Françoise, qui est l'honneur de ceste Monarchie, la gloire, & la force de nos Roys, le soustien des peuples François. & l'appuy de l'Estat, puis que ceste Noblesse masque, ceste cohue de seditieux, ceste bande infortunee & maudite qui desrobe fausement le nom duquel elle est indigne, ne recherche par ces escrits horribles, que l'opprobre de ceste Monarchie par le renuersement de l'ordre, & du respect des loix, que la diminution de la gloire, & de l'autorité du Roy, que la ruine des peuples, que l'esbranlement de l'Estat, & la subuersion entiere de la Pieté, & de la Religion. Ce ne peut estre la Noblesse Françoise, qui a l'honneur d'approcher de leurs Maiestez autant de fois qu'elle veut, qui leur parle avec toute liberté, qui les voit tous les iours iusques dans leur cabinet, puis que ces seditieux qui paroissent en son nom, se plaignent, *d'auoir esté exclus de pouuoir parler à*

leurs Maistres. Comme si elles estoient enfer-
mées, ne se communiquoient à personne, a-
uoiet l'oreille sourde aux plaintes qu'o leur fait
ou comme si on pouuoit persuader aux peup-
les ainsi qu'on fit au siecle dernier, que le Roy
& la Reyne sa Mere sont prisonniers, & n'ont
pas assez de liberté pour commander. En fin c'est
tout autre chose plustost que le discours d'hō-
mes qui soient Chrestiens, Francois. & Gen-
tilshommes, que de protester, De ne vouloir
plus attendre du Conseil du Roy le remede aux de-
sordres de l'Estat: Que c'est le Conseil qui en me-
dite la subuersion: Que le gouuernement du Ro-
yaume a esté pernicieux depuis la mort du Roy
que la regence de la Reyne a esté establee contre les
loix fondamentales du Royaume: Que la Noblesse
est traittee plus barbarement qu'à la Turque: Que ce
Royaume est la retraicte des Tyrans. c'est la voix
non des Gentilshommes, mais de quelques fu-
rieux, laquelle ie ne puis rapporter qu'avec
horreur, qu'aucun ne doit lire qu'avec exe-
cration, Qu'ils protestent de nullité & tyrannie,
contre tout ce qui s'est fait, & fera desormais en
l'administration du gouuernement. Appellans
aussi la regence de la Reyne, & la conduite
des affaires de l'Estat, que le Royluy a donnée,
que tous les Parlemens de la France, les Estats
Generaux du Royaume, tous les Ordres, &
generalement tous les bons François, ont ap-
prouée, & la celebrent encores tous les iours
avec toutes sortes d'applaudissemens, l'appel-
lans, dis-ie, avec vne impudence desbordée
& digne d'un chastiment exemplaire, Un mes-
pris des Loix fondamentales & des costumes ob-

seruees pendant le bas aage des Roys. Mais ce qui
 affeure tous les gens de bien, contre l'artifice
 de ces calomniateurs : c'est que le sens com-
 mun mesme suffit pour enseigner aux plus stu-
 pides, que nul ne pouuoit mieux affectionner
 le bien des affaires du Roy., que la Reyne sa
 Mere, de laquelle seule, par la benediction de
 Dieu, l'Estat a retiré les moyens paisibles de sa
 conseruation, qui ne se pouuoient en aucune
 autre personne qu'en elle, comme vn chacun
 le confesse auiourd'huy ouuertemēt. C,'a esté
 aussi la Loy ordinaire de l'Estat, & la coustume
 obseruee autāt de fois qu'o a vescu en paix du-
 rant le bas âge des Roys, que de deferer la cō-
 duite des affaires à leurs meres, lors que les
 Roys n'y auoiēt point pourueu par leur Testa-
 ment ou par autre declaration expresse. Et la
 raison en est bien euidente, en ce que leurs mè-
 res ne peuuent rien gagner au changement de
 l'Estat, que c'est autāt comme si on leur des-
 chiroit le cœur, que de procurer quelque dimi-
 nution à l'autorité des Roys, & quelque chā-
 gement en la Maiesté, & splendeur de leurs E-
 tats, & en ce que la pieté qu'elles ont pour les
 Roys leurs enfans, ne peut estre destruite, qu'e
 estouffant entierement les loix de la nature.
 L'euenement aussi a monsté à diuerses fois,
 que tous les autres moyens qu'on a employez
 pour pouruoir au gouuernement, ont esté or-
 dinairement suivis de mal-heurs funestes, &
 eussent sans doute en ce réps plus qu'en nul au-
 tre, attiré sur tout ce Royaume de tres-horri-
 bles confusions, avec des ruines toutes certai-
 nes. Chacun aussi s'eslouyt grandement, de

voir que le Roy, depuis sa maiorité a assés de droit, & de pouuoir, pour reprimer l'ambition de tous ceux, qui voudroient se porter à vn dessein si detestable, que de desirer d'entreprendre malgré luy, sur la conduite de l'Estat. En outre la Noblesse a tousiours hay les Guerres ciuiles, comme la peste de l'Estat, & le plus grand mal-heur qui luy pourroit arriuer. Elle a tousiours accoustumé de mettre l'espee à la main pour faire obeir le Roy, pour soutenir son autorité, & pour chastier les rebelles, & les sedirieux. Elle a esté tousiours la premiere à immoler sa vie, pour destourner les malheurs du public. Elle est dans le corps de l'Estat, ce que les esprits animaux sont dans les corps humains, ayant le Roy pour son Principe, & ne se mouuant que par ses loix, & par sa volonté. Il est donc impossible en toutes sortes qu'elle ait voulu se laisser emporter, à vne si impie, & maudite resolution que de persecuter le Roy par felonie durant son bas aage, d'affiger la Reyne par des menaces furieuses, de deschirer les loix del'Estat, de menacer, *de courir sus à ceux qui s'oposeroient aux malheurs publics*, de diffamer par des calomnies horribles, les principaux Ministres du Roy, & d'apeler tout le monde au desorde, & à la confusion pour perdre & destruire ce Royaume, sous pretexte de le vouloir conseruer. Outre toutes ces preuves qui sont puissantes pour conuaincre que ce meschant abuse du nom de Messieurs de la Noblesse, les plaintes qu'il forme contre le Gouuernement sont si iniques qu'elles publiēt assés, que ceux qui souillent ce nom si illustre,

& si glorieux, sont ceux la mesme, qui ont travaillé il y a desia long-temps, & qui ne cessent encores tous les iours d'employer toutes les plus peruerfes inuentions de leurs esprits pour ietter des diuisions entre les plus grands du Royaume. Vne de celles qu'il fait le plus fausement, & avec vue profonde malice, c'est qu'en l'assemblée des Estats on a enuoyé des Archers aux portes de l'assemblée, pour empescher que le premier Prince du sang ny fust receu. Et neantmoins tout ce qu'il y a de gens de bien à Paris tesmoignent ouuertement contre ce faulsaire, que les Archers, qui ont esté quelquefois enuoyés en fort petit nombre, aux Augustins, durant la tenuë des Estats, n'ont iamais eu autre charge que de pouruoir, comme il est ordinaire de faire aux grandes assemblées, que nul desordre ne suruint par le moyen de la multitude de toutes sortes de personnes, qui par curiosité se portoiēt en ce lieu la. Et cela a esté tousiours ainsi fait pour éuiter les tumultes, & les bruits qui arriuent aux entrées, & aux issuës, & le plus souuēt par le moyen des pages, & lacquais que chacun a veu maintesfois vser de grande insolence, en leurs cris, & bateries ordinaires, nonobstant le soin qu'on auoit de les empescher. C'est ordre estoit deu à l'honneur, & au repos de ce grand corps, qui representoit tout le Royaume. La honte donques, s'il en reste encore quelque peu à cés mal-heureux, deuoit elle pas leur arracher la plume des mains quand ils ont escrit, contre toute aparence que ces Archers estoient destinés pour empescher l'entree à Monsieur le Prince? Et ceux qui scauent quel

quel est le rang que les Princes du sang tiennēt en ce Royaume, qui sçauent que les Archers du grand Preuost, ne sont pas de telle qualité qu'on les voulust employer à vne charge de si grande conséquence, qui sçauēt que la plus part du tēps il ny auoit point d'Archers, & que lors qu'ils y estoient, leur charge estoient simplement de chastier les pages, & lacquais qui se portoit insolemment à l'entrée; Ceux qui ont esté tesmoins à Paris & dans l'assemblée des Estas, des choses qui sont aduenues durant ce temps là, ne iugeront ils pas facilement que c'est vne maudite inuention, & vn dessein pour faire croire aux peuples, que la maison Royale est trauaillée de grandes diuisions? Et ne sont ce pas des boute-feux, qui semblent estre entretenus par quelques estrangers, afin d'enflāmer toutes sortes d'esprits, & pour semer la diuision en toutes les parties de l'Estat? Mais Dieu dissipera tous leurs conseils. Car monsieur le Prince qui sçait que telles personnes doivent estre en horreur aux Grands, plus que tous les mauuais inconueniēts dont ils sçauoient jamais estre assaillis, sçait aussi qu'il doit destourner au loing toutes leurs praticques, & asfermir au contraire, tous les iours l'autorité souueraine du Roy & la paix du Royaume. Il sçait qu'il est obligé de faire sentir à ces factieux, autant de fois que l'occasion s'en offrira que les grands ne peuuent jamais bien aimer, ceux qui taschèt d'aigrir l'esprit du Roy cōtr'eux; & ne peuuent au contraire que detester leurs mauuais cōseils, & esloigner d'eux avec horreur, & execration leurs personnes. Les Estats Generaux ont esté libres, & n'ot

point esté retenus ny empeschés en leurs deliberatiōs par la presēce du Roy, de la Reyne, ou desprinces. S'il auoit esté autrement, quemōsieur le Prince s'y fust trouué, ceux la mesme qui donnerēt lieu à ces inuētiōs auroiēt esté les premiers apublier, que la liberté des Estats auroit esté violée. Aussi c'est chose certaine que iamais Monsieur le Prince n'a fait semblant d'y vouloir assister, n'en a iamais parlé, ny fait parler à leurs Maiestez ny à aucun de ceux qui auoient entree aux Estats. C'est donc vne impudence bien affrenee au iourd'huy, qu'un chacun dans la foule entreprenne de faire des plaintes au nom de Monsieur le Prince, contre son gré, contre la verité, & à son desauantage. C'est donc vne passion furieuse de ceux qui n'ayment point le Roy, qui ne peuent estre vaincus par la douceur de la Reyne, qui sōt irrités des benedictiōs que tous les François donnent à ceux qui nous conseruent la paix, & c'est cette passion qui les porte à faire croire aux peuples, que la force de cet Estat est tout diuisée & destruite. Au cōmencement lors qu'il pleut au Roy de resoudre la tenue des Estats Generaux, par le Cōseil de la Reyne sa Mere, & ce auparauant que personne l'en requist, chacū sçait de quelles dissensions & factions ce Royaume estoit menacé: Car outre le mal-heur general des diuisions es choses de la Religion, qui donnoit iuste subject d'aprehension aux plus sages, puis que c'a esté la premiere fois, que des Deputés autres que Catholiques ont esté reçeus en telles assemblees, il y auoit encore d'autres pratiques & menées dans les Prouinces, d'une infinité de personnes desi-

reuses des nouueautés, & changemens. Si les
 Gouverneurs des Prouinces suiuaient leur deuoir,
 & pour obuier à tous inconueniens ont eu soin
 sur les lieux, de moyenner que les Elections se
 feissent des personnes affectionnées au service
 du Roy, & à la paix, si les Estats estés assemblés
 ont tous esté portés au bien, par vn cōmun con-
 sentement, s'ils ont usé de tout respect, & obeis-
 sance aux cōmandemens du Roy, s'ils ont pu-
 blié les obligatiōs que toute la Frāce à au Gou-
 uernemēt de la Reyne, ces phrenetiques qui se
 desesperent parce qu'ils nous voyent en repos,
 s'escrient. *Que ce n'ont esté que brigues, ordures, &
 Tyrannie, qu'on a corrompu les vns et intimidé les au-
 tres.* Mais n'est-ce pas vne preuue pl^e claire que
 le Soleil, que tout leur discours n'est autre chose
 qu'une desesperée calomnie, contre la Nobles-
 se, en suite des autres libelles qui l'ont deschi-
 rée de toute sorte d'outrages, par ce qu'elle n'a
 point escouté, ceux qui la vouloient porter à la
 rebellion? Car les Deputés de cēt ordre, qui ne
 croit point de posseder rien de solide, & perma-
 nent que l'honneur, lesquels ce faulxaire fait icy
 parler contr'eux-mesmes, ayans tous cōspiré v-
 nanimement au bien del'Estat, & à rechercher
 le contentement de leurs Majestés, ozeroient
 auoir escrit à leur propre cōfution, *Qu'ils ont esté
 partie corrompus, & partie intimidés?* Mais com-
 ment ont-ils esté corrompus, puis qu'ils n'ont
 eu autre but que de seruir le Roy, & d'af-
 fermir la paix? Et par qui est-ce qu'ils ont
 esté corompus puis qu'ils n'ont rien fait, que
 sous le bon plaisir de leurs Maiestez? N'est-ce
 pas donc icy, vn exemple de la plus desordon-

nee insolence, dont iamais on ait ouy parler, & qui est sans aucun exemple dans nostre histoire, qu'on appelle aujourd'huy, *corrompus pensionnaires, & traistres*, ceux qui reçoivent les bienfaits de leur Prince, qui le seruent contre les factions, qu'on veut former dans l'Estat, & qui n'ont autre volonté que de se conformer à ses commandemens? Mais la vraie cause de leurs iniures atroces, n'est elle pas parce qu'ils n'ont point voulu ouyr parler de troubler la paix dedans ny dehors le Royaume: qu'ils n'ont point voulu se laisser corrompre pour former vn parti dans l'Estat contre le Roy: qu'ils n'ont pas voulu seulement penser à tirer des mains de la Reyne le Gouuernement del'Estat, & qu'ils n'ont pas voulu donner lieu aux brigues qu'on a publiquement faites, à l'endroit de plusieurs, pour porter toutes choses aux extremitez? Aussi peules a-t'on intimidez que corrompus. Car de quoy pouuoit auoir peur, la plus genereuse Noblesse qui soit dessous le ciel? De quoy est-ce que pouuoient estre intimidez ceux qui diroient encore fort genereusement à Alexandre s'il reuenoit *Qu'ils n'ont peur de rien si ce n'est que le ciel ne tombe*? Et de quel costé leur seroit venue la peur? Seroit ce de la debonaireté nompareille du Roy, où del'excessive bonté de la Reyne? Non non: s'ils ont eu crainte, ç'a esté comme ceux qui ayment Dieu, qui nont autre peur ny crainte que de l'offencer, & qui n'aprehendent pas en esclauies la seuerité de ses chastimens, mais detestét cōme vrayes enfans, l'iniustice qu'on cōmet en l'offeçant. Ceux aussi qui ont eu l'honneur d'assister aux Estats, qui

ont leu les cahiers pareux presentés au Roy, qui ont consideré le nombre, & l'importance des articles par eux proposés pour le bien de l'Estat, ne iugeront iamais qu'il y ait eu corruption, ny terreur quelconque, qui les ayent empeschés de faire, & procurer le bié du Royaume, autant que la condition du temps present, (la consideration duquel est tousiours la loy supreme de la reformation des Estats,) l'a peu permettre. Je ne voudrois point renouveler la memoire des miseres qui ont trauaillé nos peres au dernier siecle, que ie voudrois au contraire estre esteinte pour tout iamais, & ie supplie tres instamment tous les gens de bien, qui les ont veüs, ou qui les lisent, de trouuer bon, que nous deuenions sages à nos despens, que nous aprenions par les fautes que nos Peres ont faites à n'en faire point de semblables, & que nous formions sur les observations de leurs mal-heurs, des reigles & maximes infailibles qui nous seruent a les euitier. On a veu autresfois assés souuent, que ceux qui poursuioient par tous les artifices à eux possibles, que le peuple fust surchargé, & foulé par des nouuelles, impositions estoient eux mesmes les premiers qui crioient apres à l'encontre en faueur des peuples, pour rendre odieux nos roys & pour aduantager leurs factions dans ces mescontétemens publics. Chacun le voit, & pleust à Dieu qu'il ne fust pas vray! que ceux-là mesme, qui suscitent tous les iours de nouvelles affaires au Roy, & à ses ministres, pour les empescher de resoudre pleinement les responce des cahiers des Estats Generaux, sont eux mes-

mes les premiers qui en esmeuent les plaintes, & qui crient qu'on n'a point pourueu à les faire respondre pour soulager le peuple, & pour cōterter tous les Ordres. Chacū sçait, & on ne le pourroit pas auoir si tost oublié, que ceux-la mesmes qui auoyēt animé les Deputez à poursuivre la supression du droit annuel, ont esté ceux qui ont tout ouuertement aidé à fomen- ter & accroistre le ressentiment general, qu'on a veu dans tout le Royaume, en toutes les cō- pagnies de Iustice, ausquelles ceux la mesmes qui en auoient procuré le mescontentement, n'oubloient pas de reprocher, que c'estoit vne pauvre recompense qu'on leur donnoit, d'a- uoir contenu les peuples en deuoir, & dans l'o- beyssance du Roy. Et nous ne sentirons pas en- cores que la faction se forme tous les iours dans l'Estat au preiudice des droicts du Souuerain? Et nous ne confesserons pas que plusieurs re- cherchent à quelque prix que ce soit, de ruiner & de schirer la paix? Mais puis qu'ils se plai- gnent de ce que le Roy, a fait pour l'annuel, il est iuste qu'un chacun voye le peu de subiect qu'ils en ont. C'estoit le feu Roy qui l'auoit pre- mieremēt estably, plustost à la poursuite d'au- truy, que par sa propre inclinatio. Ce que sans doute il n'eust pas fait, s'il eust preueu que c'estoit le moyen pour renuerser avec le temps l'administration de la Iustice, pour ruiner la pluspart des familles par le prix excessif des Offices, pour esleuer plusieurs à vn abus tres-insolent des charges publiques, pour y ap- peller grand nombre de personnes, plustost par le moyen des finances, que par les degrez de l'honneur & de la vertu, pour oster dans l'esprit de plusieurs le sentiment de l'obligation que tous les Officiers doi-

uent auoir au Roy, car l'opinion que la grande des-
 pence qu'ils font pour y paruenir, leur fait facilement
 conceuoir, de n'en estre tenus qu'à leurs fortunes, &
 non pas au choix ou à l'eslection de celuy au nom du-
 quel ils tiennent leurs charges, Et finalement s'il eut
 preueu les difficuliez qu'il y auroit quand on le vou-
 droit esteindre, & les mescontentemens de ce grand &
 effrené nombre d'Officiers de Iustice, & des Finances.
 Et ce que le feu Roy n'auoir pas preueu, nous le sentôs
 & le voyons tous les iours: & principalement le grand
 & extreme deplaisir que tous les Officiers ont eu à la
 nouuelle de la suppression de l'annee, & de la venalite
 des offices que le Roy auoit accordee, pour descharger
 & soulager tous ses pauures subiets. Car on a veu de
 toutes pars des mouuemens, desquels ie croy qu'il vaut
 mieux se taire prudemment, que de les publier à la hon-
 te de leurs autheurs, au deshonneur du siecle où nous
 sommes, & à l'infamie eternelle de ceux qui ont voulu
 par ce moyen troubler la paix. Ce qui a esté l'ynique &
 la vraye cause pour laquelle le Conseil du Roy a sage-
 ment donné l'Arrest du treziesme iour de May de ceste
 annee, pour lequel on ne peut pas le blâmer iustement
 d'auoir reuoqué la parole qu'il auoit solennellement
 donnee aux Deputez des Estats, puis qu'il a esté neces-
 sairement obligé par les plainctes qui venoient de tous
 les endroits du Royaume, de par les Officiers, & par
 beaucoup de grandes considerations d'Estat, qui ne
 pouuoient souffrir qu'en ce temps on mescontentast
 vniuersellement, ceux qui ont la principale autorité
 dans les villes, qui ont tres-bien seruy aux dernieres oc-
 casions, & qui par l'interest de leurs familles, se trou-
 uent grâdemēt necessitez à maintenir la paix, & trāquil-
 lité publique. puis aussi qu'il est notoire que la parole
 du Roy n'est pas reuoquée simplement par l'arrest, veu
 qu'elle aura son effet, au temps qui suiura celui de l'ac-
 complissement du contract fait avec ceux qui en ont le
 party. qui tombe iustement en l'annee 1617. y ayant eu
 quelque raison de ne desroger point facilement aux Ar-
 rests du Conseil donnez pour l'annuel es annees 1611, &
 1612. ny à vn contract passé par le Roy, sur la foy duquel

vne infinité de personnes auoient employé tous leurs
 biens pour acheter des Offices. Il n'est pas aussi iuste
 de vouloir avec malice, que les paroles du Roy soient
 irrenuocables comme les Edits de Perse, quand il y va
 de l'intereſt de l'Eſtat, & de la paix & ſeureté publique:
 Puis que le mal-heur du temps où nous ſommes, l'ini-
 quité de pluſieurs, les factions qu'on taſche d'eſtablir
 dans l'Eſtat au preiudice de ſon autorité, & l'artifice
 de ceux qui auoient deſiré qu'on oſtaſt la venalité: &
 qui neantmoins ont eſté les premiers qui ont fomenté
 les plainctes des Officiers: & les ont irrité contre la
 deliberation priſe ſur leur inſtance, & à leur poursuite
 puis, diſ-je, que toutes ces conſiderations tres-veri-
 tables, ſont autant de raiſons puiſſantes & neceſſaires,
 qui ont meu le Roy de ſ'accommoder à la neceſſité des
 affaires, & à la volonté de ſes ſubieſts, comme le pere
 en uſe ordinairement à l'endroit de ſes enfans & Dieu
 meſmes à l'endroit de ſes creatures. La procedure donc
 qui a eſté tenuë en ceſte affaire, ferme la bouche à ceux
 qui ſe plaignent. Meſſieurs du Cleigé, & de la Nobleſ-
 ſe, ont deſiré aux Eſtats que le droit annuel fuſt oſté
 Ceux du Tiers Eſtat, c'eſt à dire preſque tous les Lieu-
 tenans & Generaux du Royaume aſſemblez, ont deſiré
 ſoit que ce fut pour aneantir ceſte propoſition ou au-
 trement, que le Roy oſtaſt tout a fait la venalité des
 Offices. Le Roy pour les contenter tous a déclaré, qu'il
 ſupprimoit l'annuel & la venalité. En ce meſme temps,
 & cela ne ſe peut pas nier, on a veu que tous les Offi-
 ciers du Royaume, ont crié, & ſe ſont plaints de tous
 coſtez, afin que ie ne die pas dauantage. Sur cela le
 Roy a déclaré, que ſa parole n'aura point ſon accom-
 pliſſement, que d'icy à deux années, que le terme du
 contract ſera expiré. Ceux qui oſent meſchamment &
 avec des paroles dignes de mort, blaſphemer contre le
 Roy, & à ceſte occaſion ſont-ils pas dignes de la haine du
 Ciel, & de celle des hommes? ce n'eſt pas que ie veuille
 flatter le mal-heur de ce ſiecle, ny louer la venalité des
 charges, de quelque nature qu'elles ſoient, puis que
 c'eſt vne des plus grâdes ruines: qui menacent l'Eſtat,

& qu'il a esté tresbien dict par les Grecs, d'un de leurs Empereurs, qui auoit vendu les dignitez de l'Empire, *Qu'il auoit changé la Monarchie en Aristocratie*, la Royauté en vn gouuernement populaire, & s'estoit fait par ce moyen beaucoup de compagnons, comme nous ne le ressentons que trop tous les iours en ce Royaume : puis aussi que c'est vne des choses qui attirent le plus sur nous les verges de Dieu, aux oreilles duquel la voix & les plainctes des peuples oppressez par l'auarice des mauuais Iuges crient incessamment, & demandent vengeance. Mais ce que ie veux seulement, c'est de monstrier que c'est encore vn mal necessaire dans l'Estat, qu'il faut que nous souffrions avec patience, sans blasmer les actions de ceux qui gouuernent, qui gémissent eux-mesmes plus que nous, de se voir gehennez & forcez de fleschir & de ployer l'autorité publique, & à rabattre de la vigueur des resolutions prises pour le bien du Royaume, afin de ne hazarder rien mal à propos, en vn temps auquel il semble que tous les François conspirent à destruire le respect qui est deu aux loix de l'Estat. C'est aussi avec outrage qu'ils se plaignent que le Roy continuë les pensions : Car ils voudroient sans doute exciter encores de nouueaux mescontentemens par ce moyen : Et tel en crie le plus, qui en a plus qu'il n'en merite, ou qui est despité de n'en auoir autant que sa conuoitise effrenée en desire. La proposition qu'on fist de les oster, estoit vn contre-coup donné à Messieurs de la Noblesse, par ceux qui se faschoient qu'on ostant l'annuel : Mais s'il plaist à Dieu, le Roy pouruoirà les contenter tous, quand il en sera temps, & soulagera

par ce moyen son peuple, au grand regret de ceux qui par ces escrits venimeux pourchassent de le mettre en ruine. La Chambre de Iustice qu'on n'a point voulu establir pour la recherche *des abus commis aux Finances*, est aussi vn des articles qu'ils font pour descrire le gouuernement. Et par là on decouure clairement que ces gens desirent avec vn transport demesuré, de voir le desplaisir & les mescontentemens de toutes les parties de l'Estat: de la Noblesse en ostant les pensions de la Iustice en ostant l'annuel, de tous les Officiers des Finances par la Chambre de Iustice; afin que les factions pussent plus facilement prendre pied, & gagner place dans les cœurs de ceux qui prefereront leur intérêt à celuy du public, desquels le nombre sera tousiours beaucoup plus grand que ceux qui voudroient par leur perte, seruir au bien du general. Que s'il estoit aduenu que le Roy eust voulu espraindre, comme disoit quelqu'un autresfois ceux qui sont les vrayes sponges de ses finances, on auroit crié infailliblement, que ce n'estoit point pour le Roy qu'on le faisoit, mais pour faire passer es mains des particuliers, les despouilles des meilleures familles de Paris, & d'ailleurs. On eut veu de toutes parts multiplier les plainctes de ce nombre excessif, & presque insupportable des Officiers des finances: & parauenture eust-on déploré de voir encor vne fois les bons porter la peine des mauuais, avec vn desplaisir extrefme de ceux qui aiment la Iustice. Ceux donc qui s'imaginent de telles réformations dans l'Estat, durant le bas âge du Roy, sont semblables à ceux qui tuent les corps humains, à force de les purger & saigner: Et ie ne

croy pas mesmes qu'ils soient si peu hardis, qu'ils
 n'ozent quelquesfois s'en prendre contre Dieu,
 parce qu'il supporte & endure vne infinité de maux
 entre les hommes, qu'il pourroit facilement oster,
 voulant par sa patience conseruer en ceste sorte
 l'ordre de l'Vniuers. Que si c'est l'amour & la cha-
 rité qu'ils ont pour le bien de ceste Monarchie,
 qui leur fait faire ces propositions en ce temps icy,
 c'est de leur deuoir d'y conioindre la prudence, &
 de reconnoistre qu'elles seront bonnes à faire, à
 resoudre, & à estre vigoureusement & viuement
 mises à effect, lors qu'il aura pleu à Dieu d'en don-
 ner au Roy avec la volonté, le moyen si aisé & si
 facile qu'il ne puisse plus apprehender que les re-
 medes qu'on employera à la guerison de l'Estat, ne
 soient pires que les maux mesmes qui le trauail-
 lent. Ils se plaignent des diuersitez & mutations
 qu'on voit és conseils qui ont esté pris pour des
 affaires fort importantes, & nous proposent celle-
 cy, comme la plus digne de leur obseruation, apres
 celle de l'annuel, *Que le Roy auoit de sa bouche ordon-
 né à ceux de la Religion pretendüe reformée, la ville de
 Largeaux, pour estre le lieu de leur assemblée politique,*
neantmoins bien tost apres on leur a assigné Grenoble:
 Mais pour ne dire rien des iustes raisons qu'on a eu
 de preferer l'un à l'autre, pour gratifier ceux qui en
 ont fait la poursuite : Il est certain que ceux-là
 mesmes s'en pleignent, qui sont faschez de voir
 que le Conseil du Roy mette vn grand soin à pre-
 uenir toutes leurs mauuaises intentions, les empes-
 chant par ce moyen d'aduancer leurs affaires dans
 le mescontentement de leur party : Duquel aussi
 en ceste plainte, ils publient la mauuaise conduite,

à leur honte, & à l'honneur des ministres du Roy ; qui pour empescher leurs mauuais desseins, moyēnent que le Roy, comme pere commun de ses subjects, ayme mieux supporter leurs deffauts, & leur donner loisir de se recognoistre, & de faire mieux, que d'vser de toute rigueur enuers eux, puis qu'ils se iettent à ses pieds, qu'ils le supplient avec toute humilité, & qu'ils aymēt mieux obtenir ceste grace de sa Majesté seule, que d'y employer le credit & la faueur de ceux qui abusent trop souuent de leur nom, pour destourner le cours des affaires publiques : ausquels aussi si leurs Deputez se fussent adressez pour obtenir ce changement, ils auroiēt eux-mesmes, en cas de refus, crié les premiers tout au contraire de ce qu'ils font maintenant. Ceste procedure est si cogneuë, & ils l'ont si souuent tenuë, qu'on ne s'en estonne plus à la Cour. En vn mot, le Roy sans contredit, peut & doit ordonner à ceux de la Religion pretenduë reformée le lieu de leur assemblée. Il y a quelque temps qu'il leur auoit donné Grenoble : mais parce qu'ils eurent quelques ombrages contre monsieur le Marechal Desdiguieres, ils insisterent en leurs supplications à ce qu'ils ne fussent pas obligez d'y aller, & aymērent mieux desirer la tenuë de leur assemblée, pour voir aussi par ce moyen quelle seroit l'issuë des Estats Generaux. Depuis ce temps-là, le Roy desirant gratifier quelques-vns d'entre eux, à leur instance & poursuite nomma Iargeaux : Mais parce qu'il y eust encor parmy eux quelques nouueaux subjects d'ombrage, contre ceux que le Roy auoit desiré de fauoriser par l'eslection de ce lieu, ils le supplierent tres-humblement qu'il leur fust per-

mis d'aller à Grenoble. Les raisons qu'on auoit eu la premiere fois pour les y enuoyer estât tousiours les mesmes, le Roy ayant ordonné ce lieu là au commencement, & la diuersité n'estant venue que de leurs diuisions: Il est tres-certain que ceux qui se faschent de ce qui a esté fait, sont marris que le Roi ait voulu contenter ses subjects malades & difficiles, & qu'il ait voulu s'accommoder à leurs volontez, pour les obliger par sa douceur a vser dans leur assemblée de toute modestie, & à ne rechercher que la paix & l'observation des Edicts, pour le bié de son seruice: Comme il y a apparence qu'ils ferôt s'ils ont desir de ne se rendre point odieux au Roi, & insupportables à l'Estat, par le mespris & l'abus des graces qu'on leur fait tous les iours. Ceux-là mesmes qui se faschent qu'on change les deliberations du Conseil és affaires, desquelles le changement a eu pour but la paix & le repos du Royaume, font tout ce qu'ils peuuent pour obliger le Roy, au contraire a rompre sa foy, sa parole, & son mariage, parce qu'ils croient que l'issüe de ceste rupture leur donneroit des éuenemens conformes à leur humeur, & à la haine qu'ils ont conceüe contre la paix: Car combien qu'ils facent semblant de ne desirer si ce n'est qu'on la differe: neantmoins chacun voit à quoy ils tendent, & que c'est leur interest qui les pousse, & non pas celui de l'Estat ny de la Religion. Nous voyons aussi que nonobstant que le corps des Estats Generaux ait supplié tres-humblement la Royne pour l'accomplissement du mariage du Roy: toutesfois ce mal-heureux Escriuain, duquel nous descouurons les impostures, fait parler la Noblesse au contraire, avec des termes dignes des plus extremes supplices. Qu'un

chacun donc iuge que ce n'est point la Noblesse Françoise au nom de laquelle il parle: mais plustost que c'est au nom de ceux qui sont reconus de tous comme les pestes de l'Estat, & les monstres qui recherchent sa ruine. On sçait que ç'ont esté Messieurs les Princes du Sang qui ont agréé ceste Alliance, & qu'on ne la pourroit auiourd'huy differer ny violer sans le deshonneur du Roy, & sans engager l'Estat aux mouuemens que ceux-là seuls peuvent desirer, qui recherchent leur contentement dās les miseres & calamitez publiques. Chacun iuge aussi facilement qui peuvent estre ceux-là par l'artifice desquels principalemēt ces plaintes sont semées parmy le peuple, puis que tant de gens diffament l'Alliāce d'Espagne, & il nes'en trouue point qui escriue vn seul mot contre celle d'Angleterre. C'est aussi vne fureur desesperée qui les pousse en escriuant, *Qu'on stipule aux Espagnols pour dot de tels mariages, tout ce que nous possedons, nostre sang, nos vies, & nos amis.* Ce qui fait encore mieux cognoistre à ceux qui sont sans passion, que ceste Alliance est iuste, puis qu'elle est si iniustement assaillie, qu'elle est bonne, puis qu'on la diffame par des procédures maudites & detestables, & qu'elle est agreable à Dieu, puis que les meschans en font tant de bruiēt. Aussi ceux qui la descrient le plus, hayssent plus la paix & l'autorité du Roy, qu'ils ne hayssent les Espagnols, & apprehendent beaucoup plus qu'aucune autre chose l'establissement des affaires du Roy, l'affermissement de son autorité, la paix de la Chrestienté, qui semble ne pouuoir plus estre ébranlée, si ces trois grands Roys peuvent conuenir amiablemēt, & se proposer en commun ce glorieux & iuste dessein, d'empescher que les peuples

Chrestiens ne se destruisent plus les vns les autres.
A quoy ceux qui sont agitez des passions d'auarice, d'ambition, & d'enuie, ne prestent point leur consentement, parce qu'ils n'ont point de felicité que dans la confusion, & ne croyēt point de deuenir plus grāds qu'ils ne sont, qu'en affoiblissant l'autorité du Roy, qu'en recherchant les moyens de se rendre necessaires, & qu'en destournant par leurs maudites menées tout ce qui peut seruir à estouffer les factions qu'ils taschent de former dans l'Estat. Ce qui s'est passé à Iuliers, & le soing que le Roy a tousiours eu des affaires de Messieurs des Estats publient assez quel Alliāce d'Espagne n'est point faite au preiudice des Princes alliez de ceste Couronne, & que de leur costé ils n'ont aucun iuste subject de se plaindre : Car si le Marquis de Spinola a esté soigneux de conseruer les droicts d'un Prince Catholique, Messieurs des Estats auoient commencé eux-mesmes a tesmoigner le soin qu'ils ont de cōseruer le bien d'un Prince Protestant, s'estans saisis des meilleures places qui fussent en la successiō de Cleues & Iuliers. Mais la passion nous aueugle au iourd'huy, & nous sommes si meschāns & si iniustes, de ne pouuoir souffrir qu'on face pour les Catholiques, autant pour le moins que Mrs des Estats ont fait, en faueur de ceux de leur religiō. La mesme iniustice se voit aux plaintes qu'ils font en faueur du Duc de Sauoye, qui sont si déreglées en ces libelles qu'il seroit aisé aux Iuges, prenāt la peine, de retirer d'icelles d'assez bōnes preuues contre ceux qui en sont les autheurs, pour descouurir de quel pays ils sont, & où ils ont attaché leur fortune : Car il faut de toute necessité qu'ils y pretendēt quelque grād interest en leur particulier, & que leur fin soit bien

24
mauuaife, puis qu'ils offensent si indignement le Roy, & tout le gouuernement de l'Estat, qu'il n'y a aucū sujet naturel du Duc qui ozaſt pis faire. Attendant que Dieu leur face trouuer le chaſtiment qu'ils recherchent par leur licence deſbordée, faiſons voir aux gens de bien que leurs plaintes ſont iniques. A la verité il ſeroit grandement à deſirer, que cōme la valeur & le courage de ce Prince, ſont qu'aujourd'huy il eſt en admiration parmi les plus belliqueux, & ſont cauſe que ſon commandement eſt eſtimé, cōme de celui qui tient le premier rang entre les plus grands Capitaines de l'Europe. Il y euſt auſſi en luy pour temperer ceſte ardeur, & magnanimité d'eſprit, la froideur & égalité aux affaires, que doiuent neceſſairemēt auoir tous les Princes, qui ont leurs Eſtats mediocres, & qui ont des voiſins plus puiffans qu'ils ne ſont pas : Parce qu'il arriue ſouuent, qu'à la longue ceux qui ſont les plus forts, ſont que les plus genereuſes reſolutions de celui qui eſt moins puiffant qu'ils ne ſont, ſe changent, luy donnent ſujet de ſe douloir pour s'eſtre pris à eux, & luy ſont conceuoir vn iuſte deſplaiſir contre ſes allies de ne l'auoir deſtourné par leur conſeil, de ſe laiſſer trop aller à ſuiure l'effort de ſon courage. Comme il arriua, lors que pour acquerir la gloire d'auoir oppoſé ſes armes à celles du feu Roy, qui eſtoit le ſeul homme digne de commander les plus grandes armées, & les plus belliqueuſes nations de la terre ; il attira ſur luy ſon indignation, & ſur ſes Eſtats la fureur des armes Françoises, qui l'en auoient preſque entierement deſpouillé ; lors qu'il pleut au Roy, qui ne pouuoit eſtre vaincu que par ſoy-mesmes, de propoſer à tous les Roys de la terre par ſon exem-

ple, Que la plus grande gloire des Princes, c'est de pardonner & d'vser de leurs victoires avec moderation: Car sans cela, & si le feu Roy poussé de clemence, n'eust oublié le passé; il est certain que le trop grand courage de Monsieur de Sauoye l'auoit rendu en piteux estat. Il nous auoit osté le Marquisat de Saluces, lors que les calamitez publiques opprimoient la France, sous le regne du Roy Henry III. s'estant laissé violenter à son naturel belliqueux, sans quoy il eust peu considerer, combien nostre voisinage luy estoit vtile pour la conservation de ses Estats, & combien pouuoit estre salutaire à ses enfans pour l'aduenir, l'approche des armes Françoises, qui ont esté employées ordinairement pour le soulagement des foibles contre les plus puissans: cet Estat estant tousiours le vray arbitre des plus grandes & importantes affaires de la Chrestienté. A l'aduenement aussi du feu Roy à la Couronne, il auoit esté de ceux qui estimoient que ceste Monarchie s'en iroit en pieces, sans pouuoir iamais plus recouurer sa force, & son ancienne splendeur; & ne peut à la paix de Veruins domter tellemēt son naturel aguerry, qu'il voulut tout à fait terminer avec la France ses differēs, desquels il prolongea l'accord tant qu'il peut, tesmoignant à tout le mōde, qu'il estoit plus propre à entreprendre sur les plus grands Estats de la terre, qu'à traiter des accords, & à se resoudre à la paix. Laquelle il n'eut pas plustost faite, que peu s'en fallut que ses desseings sur Geneue, laquelle nonobstant la protection de la France, il cuida saisir, ne le remissent de rechef en guerre avec le feu Roy, qui dōna exēple par sa moderation aux plus grāds, d'vser prudemēt de leur courage, & de leurs forces,

de peur d'offencer celuy qui les donne. Depuis cela nonobstant tout le passé, il auoit commecé d'aimer le feu Roy, & en mesme temps ne se pouuant faire que la grandeur de son esprit & sa valeur, luy laissassent paisiblement iouir du repos, duquel tous les autres Princes Chrestiens iouyssoient; il delibera d'employer ses armes contre le Roy d'Espagne son beau-frere, se promettant la conqueste du Duché de Milan. Le feu Roy qui donoit la loy aux affaires del'Europe, nous ayant esté en mesme temps rauy mal-heureusement, le Roy d'Espagne, qui auoit eu soin d'asseurer par les armes, les Estats qu'il a en Italie, estoit tout resolu de se ressentir contre son Altesse du dessein qu'elle auoit fait tout ouuertement d'enuahir ses Estats: Et les moyens qu'il auoit alors de le faire avec grand aduantage contre elle, comme ceux qui se cognoissoient aux affaires l'aprehendoient grandement, furent cause que la Roynes prenant en main son salut, & ne voulant point qu'il fut contraint de déplorer en sa ruine, que la France l'eut abandonné à son besoin, mit ordre en toute diligence, à ce que le Roy d'Espagne cogneut, que nonobstant que la France fut desnuee du feu Roy, & qu'elle fust plongée dās vn abyssme de douleurs, & de maux par le moyen de sa perte: neantmoins elle ne consentiroit iamais à l'oppression des Princes qui sont ses alliez: lesquels elle vouloit tout au contraire, cherir & defendre plus que iamais. Ce qui se fit avec tel effect, que le Roy d'Espagne, suiuant le desir de la Roynes, quita sa resolution, & retint l'aigreur qu'il auoit cōceüe contre Monsieur de Sauoye, mettant ordre à faire retirer la pluspart des troupes qu'il auoit en Italie: Tesmoignant par ce moyen, que nos calamitez

n'augmentoient point le ressentiment de l'iniure qu'il croyoit luy estre faicte; & voulant que publiquement on recognust qu'il n'auoit pas dessein de se preualoir contre nous, ny contre nos alliez, du mal-heur que la mort du feu Roy nous auoit apporté, & à toute la Chrestienté. Le soing donc que leurs Majestez ont eu de ses affaires a esté veritablement le plus grand secours qu'il eut iamais à son besoin. Dequoy toutesfois il n'a peu tellement se seruir pour maistriser son naturel, tout porté aux choses grandes & glorieuses, qu'il n'ait tousiours esté armé depuis ce temps-là; donnant sujet d'alarme, tantost à Messieurs de Berne pour le pais pe Vaux, tantost à la Frâce mesme pour Geneue; Iusques à ce que le Duc de Mantouë estant mort, il ietta à l'instant ses troupes sur ses Estats, & renouuellant les anciennes prétentions de sa maison, pour le Montferrat, commēça par l'execution, fit souleuer contre le Duc son allié ses sujets, saisit ses places, & entra sur ses terres à main armée. Quoy qu'auparauant il eut asseuré Monsieur le Marechal d'Esdiguieres, & celuy qui est agent pour leurs Majestez en Sauoye, qu'il ne vouloit point poursuire son droit qu'en Iustice, ou par voye d'amis communs; & que mesme il eust fait commandement au sieur Iacob son Ambassadeur, de tesmoigner à leurs Majestez, qu'il vouloit remettre son droit au iugement des deux Roys, & suiure toutes voyes de douceur, plustost que d'en venir aux armes. Ce que toutesfois il fit en mesme temps, sans en donner aucun aduis au Roy, comme il estoit necessaire en vn affaire où le Roy auoit l'interest, de son affection enuers le Duc de Mantouë son parent, de sa dignité, s'estant offert

dés le commencement pour moyēner leur paix, & de la paix publique de la Chrestienté. Mais en ne consultant que sa valeur, Monsieur de Sauoye n'auoit pas preueu que les Espagnols, qui sçauoient les desseins qu'il auoit eu vn peu auparauāt cōtre le Duché de Milan, & qui estoient obligez à secourir le Duc de Mantouë, d'autant que son Estat est depuis long temps sous la protection du Roy d'Espagne, ne manqueroiēt pas dés qu'ils le verroient aux champs, de pouruoir par les armes, & à leur seureté, & à celle du Duc de Mantouë leur allié, Non plus qu'il n'auoit pas preueu, tant il a son esprit porté aux actions de la guerre, que la France ne pourroit pas souffrir, qu'il opprimast vn Prince qui a l'honneur d'estre cousin germain du Roy. Neantmoins comme cest Estat depuis la mort du feu Roy, a tousiours soigneusement éuité les occasions des troubles dedans & dehors le Royaume, la Royne enuoyant pour le Duc de Mantouë des troupes qui alloient seulement pouruoir à sa seureté, enuoya aussi d'autre part à celuy de Sauoye vne Ambassade extraordinaire, avec charge de moyenner la paix entre ces deux Princes, & de les faire conuenir & accorder de leur different qui esmouuoit ces commencemens de guerre. Durāt le traicté de Monsieur de Sauoye, plustost par desir & avec dessein de rompre la paix & l'amitié des deux Roys; que par aucune enuie qu'il eust de se fier en nous plustost qu'aux Espagnols, ou de nous donner aduantage par dessus eux en Italie, fit semblant pour lors de desirer que les François fussent depositaires des places qu'il auoit prises sur le Montferrat: Mais la iustice vouloit que nous n'entreprissiōs point cela, au preiudice de la protection

du Roy d'Espagne, qui auoit aussi armé le premier pour la deffense du Duc de Mantouë : la prudence & le desir de la paix entre les deux Roys, nous obligoient à n'approcher point dans l'Italie les armes des François à celles des Espagnols, ny nos garnisons aux leurs : Et la difficulté eut esté grâde, quand il eust fallu pouruoir à ceux qui eussent eu le gouvernement des places, & le commandement des troupes Françoises en pais esloigné du Roy, & en vn temps où par la corruption des mœurs anciennes, il aduient bien souuent que le respect qui est deu à sa Majesté ne se trouue pas tousiours tel qu'il faudroit en ceux qui commandent. L'euenement aussi ne nous a point donné sujet d'estre marris : Car depuis cela, le Roy d'Espagne contre l'opinion de plusieurs, a rendu de bonne foy toutes ces places au Duc de Mantouë, qui en iouit paisiblement, & qui mesmes n'en a point voulu retirer quelques-vnes des mains des Espagnols, que le plus tard qu'il a peu, apprehendant de ne les pouuoir defendre contre les armes de son ennemy. A l'instance donc de l'Ambassadeur de sa Majesté, ces deux Princes remirent leurs differens au iugement des arbitres. Mr. de Mantouë consentit de pardonner à ses sujets rebelles : & sur ce qu'il demandoit pour les grandes ruines qu'on auoit faites sur ses Estats, il s'en rapporta aux mesmes arbitres du principal different pour en iuger conjointement. On continua mesme à traicter le mariage de la Princesse Douïairiere de Mantouë, avec le nouueau Duc, suivant l'ouuerture qui en auoit esté faite par le Gouverneur de Milan ; & il eut esté accompli si Monsieur de Sauoye n'eust voulu absoluëment, qu'au parauant on iugeast de leur diferent ; qu'il vouloit

estre terminé, non par la Chambre Imperiale qu'il apprehendoit, mais par les arbitres : & que le Duc de Mantouë renonçast aux pretentions qu'il auoit cōtre luy pour les ruines que son armée auoit faites en ses pais. Depuis, sur des nouuelles occasiōs, qui neantmoins en effect n'ont esté, que des pretexts du premier dessein qu'il auoit fait sur le Mōtferrat, Il fit derechef auancer ses troupes qu'il n'auoit point congediées, entra plus ouuertement en piques avec les Espagnols, avec lesquels toutesfois, & par l'assistance de leur conseil & sans en donner aduis à leurs Majestez, il auoit traicté de tirer d'entre les mains du Duc l'Infante de Mantouë, & qui plus est s'esmeut tellemēt contre ceux du Conseil desquels il s'estoit seruy, qu'il renuoya avec des paroles d'aigreur en Espagne, l'Ordre de la Toyson, & fust le premier qui se mit aux champs à main armée. Surquoy la Royne enuoya vn autre Ambassadeur extraordinaire, pour empescher que le mal n'allast en empirant. Et il est tres-vray que s'il eut voulu donner autant de lieu à nos prieres, qu'a fait le Roy d'Espagne, lequel s'est tousiours fort ouuertement remis à ce que leurs Majestez trouueroient bon, la paix auroit esté faite entr'eux il y a desia long temps : & les armées se fussent retirées au grand soulagemēt des pais de son Altesse, & avec toute seureté pour ses Estats, puis que le Roy en estoit garand, ayant esté prié par le Roy d'Espagne d'en prendre l'euenement sur soy, & d'asseurer que les Espagnols se retireroient, aussi tost qu'il auroit mis ordre à separer ses troupes. Ceux qui n'ont point de passion qui trouble leur iugement, verront aisémēt que ceux qui voudroiet que le Conseil du Roy eut pourueu par les armes à

36
mettre la paix entre ces Princes, ont vn dessein tout
formé de mettre la France en guerre avec l'Espagne
à tout hazard, & à quelque prix que ce soit. Mais
ils doiuent sçauoir que les Roys ont les loix & les
maximes d'Estat qui reglent leurs affaires, qui sont
fort esloignées des esmotiōs que la passion excite
dans l'esprit des particuliers. Ce qu'on peut con-
uaincre en ceste affaire, par toutes les circōstances.
Car quād on voit vn Prince allié commencer vne
guerre, le premier secours que ses alliez lui doiuent,
c'est de rechercher les moyens de paix, puis que la
fin de toutes les guerres c'est la paix, qu'il vaut
beaucoup mieux trouuer dès le commencement
des affaires, si on peut, que de la rechercher par le
hazard & les peines excessiues de la guerre, qui biē
souuent l'acquierent au desauantage de celuy qui
sans danger & sans mal heur la pouuoit trouuer
dans les traictez, dès le commencement. C'est ce
que le Conseil du Roy a fait en cest affaire avec
beaucoup de soin; parce qu'on a veu que la magna-
nimité de Monsieur de Sauoye & son grand cou-
rage l'auoient fait resoudre d'entreprendre ceste
guerre, sans aucune vrgente necessité: Parce qu'on
a veu que ce ne sera iamais son bien, de se pren-
dre au Roy d'Espagne: & ce seroit non pas secou-
rir vn allié, mais le perdre, que de luy donner le
moyen de cōtinuer ses desseins, contre vne si gran-
de puissance; parce qu'on a veu que quād mesmes
nous aurions eu dessein de l'engager à ceste guerre
à nos armes, il y auroit plus d'apparence, qu'il fist
sa paix sans nous, qu'avec nous, puis qu'il est beau-
frere du Roy d'Espagne, & que ses enfāns sont Prin-
ces du sang de ceste Monarchie, qui auront tou-
iours plus de sujet d'esperer leur accroissement, &

ce qui est deub à la grādeur de leur exaction és bō-
nes graces du Roi d'Espagne, qu'en son indignatiō:
puis mesmes que le General de l'armée Espagnole
est obligé au Duc, des premiers auancemens de sa
fortune. Ces deux Princes aussi estās alliez du Roy,
ç'a esté l'honneur de la France de procurer sa paix
entr'eux. plustost que de s'armer en faueur de l'un
contrel'autre, non seulement pour conseruer l'al-
liance de tous les deux ensemble, n'estant pas iuste
d'esloigner ny d'offencer mal à propos les alliez
de ceste Couronne: Mais aussi il l'a fallu ainsi faire
pour se conseruer la gloire que le feu Roy auoit
acquise, d'estre l'arbitre de la Chrestienté, de la-
quelle gloire vne prise d'armes precipitée contre
le Roy d'Espagne nous faisoit aucunement des-
cheoir; puis que par ce moyen ceste pleine & pro-
fonde paix, qui est auourd'huy entre les Princes
Chrestiens, si Monsieur de Sauoye le veut, couroit
grād hazard d'estre interrompuë & troublée pour
long temps. Que si ceux qui parlent de ces choses
à l'auenture, & sans peser les éuenemens, confide-
roient combien il est facile de commēcer les guer-
res, & combien il est malaisé de les acheuer avec
hōneur & profit; s'il consideroiēt que nous auons
beaucoup de persōnes qui peuuēt mettre les trou-
bles en ce Royaume & dans la Chrestienté, mais
que nous en auōs fort peu, qui les en puissent oster,
& qui puissent sauuer vn grand Estat d'un embra-
zement, & d'une combultion generale, sans doute
ils apprendroient à louer & benir le Conseil de
paix que la Royne a sagement & heureusement
suiuy durant son Gouvernement. Et apres tout, le
Roy a tousiours tesmoigné qu'il n'abandonneroit
iamais Monsieur de Sauoye, quand mesmes il au-

roit voulu cōtinuer à reietter la paix: car il i porte trop
 à sō Estat de l'assister s'il estoit en dāgerement: mais
 il falloit auparauāt essayer tous les moiens doux, & pai-
 sibles qui sont plus agreables à Dieu, plus vtils à la
 Chrestienté, & plus propres & plus necessaires, pour
 cet Estat, & pour celuy de Sauoye. C'est la seule cause
 pourquoy le Roy estāt informé que plusieurs cōmissiōs
 de ce Prince, auoient esté distribuees dās les Prouinces
 de son Royaume, pour faire des leuees de gēs de guerre
 sans son sceu, & contre ses deffences, son Conseil a fait
 publier l'Edit du quatriesme iour d'April, defendāt à
 toutes sortes de personnes des'armer. Cōtre cet Edit,
 ce seditieux escriuain s'escrie, comme les brigands, &
 les perturbateurs de lapaix, ont accoustumé de crier
 contre les loix qui repriment leurs crimes, & est si ef-
 fonté, que d'ozer escrire, *Que ce sont inuentions de la fa-
 ction d'Espagne, & que l'Edit a esté verifié par quatre ou cinq
 factieux, dans le Parlement à la desrobee, & que c'est vn Edit
 cōtraire au droit des gens, & à la liberté de la Noblesse,
 & milice Françoisse.* Par où il descouure son ignorance,
 & sa brutalité, & se fait plustost cognoistre vn rustre
 qui ne sçait que c'est des loix del'Estat, qu'vn Gentil-
 hōme François, qui ne peut ignorer quec'est vn droit
 essentiel à la souueraineté, de pouuoir defendre, ou
 ordonner les leuees des gens de guerre. Ce mal-heu-
 reux, aussi n'a peu blasphemer contre le Roy qui n'ait
 deschargé, ainsi il le continue par felonie, & l'ache-
 ue par des fureurs d'vn Rodomont de Theatre, me-
 naçant la Iustice de la pointe de son espee, sans re-
 garder au Ciel, & sans recognoistre, que Dieu à la
 main armee pour defendre le Roy & la Iustice, &
 que la France a assez de vigueur pour estoufer
 entre ses bras tous ceux qui voudront la plonger.

derechef dans l'abyfme des guerres Ciuiles. Lais-
 fons là donc cest infame efcriuain, qui n'a pas de quoy
 faire ce qu'il dit, & deplorons le mal-heur de nos con-
 fusions, pour recognoiftre tant mieux l'obligation
 que nous deuons à la fage conduite de la Reyne, qui
 les retient à ce qu'elle ne nous accable point. Chacun
 a veu à l'œil, & touché de la main, que plusieurs tesmoi-
 gnent la crainte qu'ils auoient de son oppreffion, qui
 neantmoins l'entretenoient en humeur, de ne vou-
 loir point defarmer, qui luy promettoient leur affi-
 stance, qui feuls retardoient l'effet des bons cōseils que
 leurs Majestez luy donnoient, & qui crioient d'un
 costé qu'on le vouloit perdre, & de l'autre l'enga-
 geoient à sa ruine, par leurs mauuaises pratiques. Et
 toutesfois ç'a esté le bon-heur de la Chrestienté, la
 gloire de ce Royaume, & le salut de ce Prince qu'au
 mefme temps qu'on diffamoit le gouvernement, la
 Reyne n'a pas laissé de faire reluire l'autorité du Roy
 dans l'Italie, tesmoignant d'une part qu'elle estoit re-
 soluë d'oposer au befoing les armes du Roy, pour cō-
 seruer ses alliez & neantmoins proposans à son Altes-
 tesse de si bons & salutaires conseils, qu'elle n'a donné
 ordre ny reputation à ses affaires qu'en les fuiuant. Car
 par leur moyen elle a embrassé paix que sa Majesté
 luy a procurée, le Roy d'Espagne s'en estant remis à
 sa conduite: a signé les articles de la paix & mis ordre
 à separer son armee: & ainsi la Reyne par vne sagesse
 accompagnée d'un bon-heur admirable, en mefme
 temps a conserué la gloire que le feu Roy auoit acqui-
 se, d'estre l'arbitre de la Chrestienté, a chassé la guerre
 hors de l'Italie, a affermy la paix entre les Princes
 Chrestiens, & a conserué parmy des volontez, & des
 interests si contraires trois alliances tout à la fois:

celle de Mantouë, à laquelle la nature & le sang obligoient le Roy, celle de Sauoye à laquelle il estoit tenu pour le bien de l'Estat, & en suite des promesses du feu Roy, & celle d'Espagne, qu'il s'est nouuellement acquise par son mariage. Ceste grande & glorieuse Princesse a conserué la dignité du Roy & de l'Estat, a estorffé les semences de la guerre, dans la France, & dans l'Italie, a continué de sauuer les peuples par la paix, a remis les Alliez de ceste Couronne en repos, & a procuré leur seureté au milieu de leurs plus hazardeuses, & dangereuses entreprises: & comme vn Astre de paix & de benediction elle a surmonté, & dissipé par les raisons de sa sagesse & de bonnairété, toutes les malignes influances dont la repos de la France, de l'Italie & presque de toute l'Europe estoit menacé. Que cela donc serue de loy, & d'exéple aux peuples, pour attendre paisiblement l'euenement & la fin des Conseils du Roy, sans les cōtrooller, & sans se plaindre, & pour detester la malice de ceux qui ont voulu sous le pretexte des affaires de Sauoye mettre tout ce Royaume en desordre, & ausquels aussi il n'a pas tenu, que par leurs procedures pleines, de rebellion, ils n'ayent precipité ce Prince en des Cōseils tres-perniciens à son Estat, & à la Religio Catholique Grande Reyne, qui attirez les benedictions du Ciel, sur les affaires qui ont le bon-heur de vostre conduite, qui auez l'assistance meueilleuse de ses graces es affaires les plus difficiles & qui auez sauué, par vos paisibles Conseils, les Estats qui les ont reueus: Voyez, comme publiquement toute l'Europe vous benit, & recognoist que la France, qui a esté obligee à la valeur incōparable du feu Roy, pour l'auoir tiree hors des guerres, qui l'auoient presque destruite, ne vous a pas auourd'huy vne moindre obligation, pour auoir

par la douceur, & moderation de vos Conseils, & par
 vostre debonnaire gouuernement, sceu empescher
 ne s'y soit iettée encor vne fois, avec vn plus
 grand malheur qu'elle n'auoit fait, puis que nous n'a-
 uons plus maintenant les yeux tournés sur aucun qui
 l'en peust retirer s'il estoit arriué, que reiettant le salut
 que vostre conduicte luy a donné, elle se fust precipi-
 tée dans les troubles. La gloire est la seule recompen-
 se digne des grandes actiōs, & des grāds Princes, tout
 le reste que les hommes peuuent donner, estant indi-
 gne d'estre offert à ceux qui donnent tout aux autres.
 Comme elle vous appartient tres-iustement, aussi
 l'avez vous toute entiere par le consentemēt des gens
 de bien, qui publieront à la posterité, que toute la
 gloire qui vous est & sera cy apres rendue en ce mon-
 de. est encor de beaucoup au dessus des biens que
 vous auez faits à la France. Il reste maintenāt que tous
 les bons François veüillent ouurir les yeux, & voir
 par la suite de tous ces sanglans libelles, que le des-
 sein de ceux qui les font & qui les approuuent, est de
 former vne faction dans l'Estat pour le remettre par
 ce moyen es horribles malheurs, desquels la memoire
 n'est pas encore passée. Car c'est pour cela qu'ils se
 prennent contre le gouuernement, le mespris duquel
 ils veulent imprimer dans l'esprit des peuples. C'est
 pour cela qu'ils deschirent l'innocence de la Reyne,
 par les plus horribles calomnies qu'ils peuuent inuen-
 ter, taschant d'attirer sur elle la haine des peuples, aus-
 quels, à son preiudice, ils proposent leur detestables,
 inuentions. Ils voyent bien que durant le bas âge du
 Roy, elle est l'vnique appuy du gouuernement de l'E-
 stat, & le fondement de tout nostre repos, & qu'elle
 est seule en France qui peut avec le consentement

de tous les grāds, & de tous les Ordres du Royaume, donner la conduite qui est necessaire aux affaires du public. Voyla pourquoy, afin de mettre tout en ruine, ils ne cessent de l'affliger & renouellent tous les iours leurs persecutions, pour lasser sa patience, pour esloigner son affection des affaires, & pour rendre inutiles les penibles labeurs qu'elle employe pour conseruer cet Estat, & pour le garantir du naufrage, comme elle a fait durant sa Regence. C'est pour cela mesmes qu'ils diffament tous les Grands qui sont à la Cour, du conseil, & de la diligence desquels sa Maiesté est dignement assistee, & qui acquierent en la seruant vn lods immortel parmy tous les François, esgalans aux lauriers & aux triumphes des plus grands Capitaines, la gloire qu'ils acquierent par leur fidelité. C'est aussi avec le mesme dessein, qu'ils font semblant de prēdre Monsieur le Chancelier à partie, afin de couvrir la haine implacable qu'ils ont conceuë contre la Reyne, sur laquelle en effect, ils s'efforcent de ietter tout le fardeau de leunie. Mais on n'a iamais veu que ceux qui ont esté esleués en ceste grande dignité, ayent esui-té les morsures des enuieux & des factieux. Au demeurant, comme les puissances que les meschans hayssent le plus, sont les plus iustes ainsi par la haine que luy portent tous ceux qui aiment les esmotions, on peut iuger combien la conseruation est necessaire pour le bien de la paix. Cependant parmy toutes ces iniures atroces, que ceux-là proferent contre luy qui maudissent le Roy, il nous fait voir par la constance de ses actions, l'image viue de ce sage Romain, qui ne diminua iamais l'affection qu'il portoit au bien de son pays, encor qu'on le traictast fort indignement parmy le peuple, & qu'on le couurit d'in-

iures. Ayant comme il a, la paix pour sa principale fin, Dieu conuertira leurs maledictions en louanges: le temps qui est le souuerain medecin des maladies de l'esprit, comme de celles du corps, fera voir mesme à ses enuieux & ennemis le nombre & la necessité de ses seruices, & la verité qui est la fille du temps, publiera à la posterité, qu'il n'a pas *nonobstant les bruits des meschans, desisté de seruir au salut de l'Estat.* Quant aux autres ministres que leurs Majestez employent en la conduite de leurs affaires, ils ne sont non plus es-pargnez que luy. Car puis qu'ils appellent tout le gouuernement *vne tyrannie & vne faction*, & qu'ils preschent la rebellion & la desobeyssance, ils descouurent assez qu'ils n'aiment rien que le malheur de l'Estat. Par les maux donc que nous veulent procurer ces mauuais François, il nous est facile de iuger qu'est ce que nous deuons faire: Et c'est de continuer plus que iamais le respect que nous deuons au Roy & à la Reyne: De nous efforcer de publier nostre obeyssance & fidelité à leur seruice: De soustenir au prix de nostre vie l'auctorité du Roy cõtre toutes sortes de factiõs; & qu'il ny a point de plus grands maux dans les Estats que les diuisions, chacun doit ayder de tout son, pouuoir à l'vnion & concorde publique. En vsant ainsi no⁹ verrõs fleurir cet Estat plus qu'il n'a iamais fait, l'Eglise attirera sur nous par ses prieres, toutes sortes de benedictions du Ciel: La Nobesse s'opposera fanchement à tous les rebelles: La Iustice prendra le glauiue à la main, avec plus de resolution que iamais, pour chastier les seditieux, & le peuple tesmoignera tousiours, qu'il ne peut viure en seureté sous autre ombre que sous celle du Roy. En fin, puis que la licence d'escrire cõtre l'Estat, se rend effrenece tous les iours,

c'est à ceux qui Dieu a mis la Iustice en la main pour punir les crimes, d'y pouruoir en telle sorte, que leurs mespris ils ne se rendent point coupables deuât Dieu & deuât les hommes, du mal qu'ils pourroient cy-apres faire, si nostre malheur vouloit que ces semences de sedition, qu'ils iettent dans les Prouinces, vinsent à desbaucher en quelques endroits les affectiōs des peuples. Permettez-moy dōc, vous qui tenez le liēt de la Iustice souueraine du Roy au milieu de vous comme le gage que le Ciel vous a donné de la duree de ceste Monarchie, qui portee peinte sur vos fronts la vengeance de Dieu à la confusion des rebelles, qui rendez le Roy redoutable par la seure obseruation des loix, & qui ne pouuez estre assis sur ces glorieuses marques du sceptre François, sans auoir fait vœu à Dieu de rendre inuiolablement à vn chacun ce qui luy appartient; Permettez-moy, au nom de Dieu, qu'avec humilité & les mains iointes, ie vous requiere au nom de tous les bons François, qui conspirent avec vous la conseruation de cet estat, de vouloir commencer à vser de vostre autorité, pour reprimer l'insolence de ces detestables libelles. Il est tēps qu'il vous plaise de rēdre à Dieu l'hōneur qui luy est deu, par le chastimēt de ceux *qui blasphemement contre luy, detractans des Puissances souueraines souueraines, qui ne regnent que par son commandement.* Il est temps que vous rendiez au Roy la Iustice qui luy est deuë, contre ceux qui dans la ville capitale de ce Royaume & à vostre veuë, ozent si souuent deschiffrer son autorité, l'honneur de la Reyne sa mere, le gouvernement de son Estat, les grands qui l'assistent, ses principaux ministres, son Estat, les grands qui l'assistēt ses principaux ministres, son conseil, son mariage, ses alliez, & qui sans aucune apprehension de chastiment,

ozent exciter les peuples à seditiō & felonie. Il est tēps qu'il vous plaise de rendre aux bons François, ce que vous leur devez, & qu'ils vous demandent affectueusement, vſant de quelque nouveau chastiment pour faire cesser ces pernicioeux exemples, qui sont des tristes presages de quelque grand mal-heur. Vous estes ialoux de vostre aūthorité, de l'honneur de vos charges, & ne voudriez pour rien endurer qu'on touchast à la gloire des dignitez que le Roy vous a dōnées, puis qu'elle sert grandement au bien de la Iustice, & à contenir les peuples en l'obseruation des loix. Chacun regarde le ſoin que vous en auez, se promet on, que vous en ferez part en ceste occurēce, à leurs Maiestez, qui sont si malheureusemēt assaillies, par ces plumes execrable, en vostre presence, & de tout le Royanme, puis qu'il importe pour vostre salut, & pour le salut de de tous, que l'aūthorité du Roy subsiste, & que le Gouvernement de l'Estat qu'il approuue, soit Sainct, & inuolable. Et puis que vous punissez seuerement par l'arigeur des loix, les calomnies qu'on a dressées contre les particuliers, chacun attend, & Dieu vous le commande par sa loy, que vous n'espargnies point ces malheureux, qui maudissent le Prince de son peuple.